

eBULETIN JSKM KPPIM

EDISI KHAS KEMERDEKAAN KE-66



**MALAYSIA
MADANI**
TEKAD PERPADUAN PENUHI HARAPAN

Isi Kandungan

- i. **Setinta Kata daripada Koordinator**
- ii. **Logo, Tema, dan Lagu Hari Kebangsaan ke-66**
- 01 Infografik Sejarah Pembukaan Malaysia**
- 03 Memori Bulan Kemerdekaan 2022**
- 07 Ini Cerita Tok Nek**
- 09 Habbul-Watan: The National Day & The Malaysia Day**
- 11 Pesanan Pemimpin buat Rakyat Malaysia Merdeka**
- 15 Rukun Negara Malaysia, Masihkah Anda Menghayatinya?**
- 17 Pengalaman Menyaksikan Sambutan Hari Kebangsaan 2019 bersama Keluarga di Putrajaya**
- 20 Semangat Patriotisme Makin Pudar**
- 22 Kenali Tokoh Pejuang Kemerdekaan**
- 24 Semangat Merdeka**
- 25 Alam Kebebasan**
- 26 Carilah... Definisi Kebebasan Itu**
- 27 Perwira**
- 28 Bunga Kebangsaan Malaysia**
- 29 Teka Silang Kata Merdeka: Kenali Jata Negara**

Sidang Redaksi

Ketua Editor

Dr. Siti Nurleena Abu Mansor

Editor

Ts. Jamal Othman

Pn. Siti Mariam Saad

En. Ahmad Rashidi Azudin



Setinta Kata daripada Koordinator

Assalamualaikum warahmatullahi wabarakatuh dan salam sejahtera.

Alhamdulillah, dengan izin-Nya, e-Buletin "Edisi Khas Kemerdekaan ke-66" ini telah berjaya diterbitkan. Pada kesempatan ini, saya ingin mengucapkan tahniah dan penghargaan yang tinggi kepada seluruh Jawatankuasa Editorial e-Buletin Jabatan Sains Komputer dan Matematik (JSKM) atas usaha berterusan dan kesungguhan dalam menjayakan penerbitan ini.

E-Buletin JSKM mempunyai kepentingan yang besar bagi kita semua. Ia berfungsi sebagai platform untuk mencatat aktiviti yang dijalankan serta berita-berita terkini JSKM. Melalui buletin ini, kita mendapat gambaran tentang peranan yang dimainkan oleh JSKM di UiTM Cawangan Pulau Pinang. Pada kesempatan ini juga, penghargaan setinggi-tingginya kepada semua warga JSKM yang telah menyumbang artikel untuk dimuatkan dalam buletin ini. Semoga ilmu yang dikongsi terus berkembang serta dapat dimanfaatkan oleh semua pembaca.

E-buletin edisi khas ini merupakan satu usaha murni JSKM dalam memperingati hari kemerdekaan. Kemerdekaan kita yang ke-66 pada tahun ini bertemakan Malaysia Madani : Tekad Perpaduan, Penuhi Harapan. Kita merayakan hari kemerdekaan sebagai tanda menghargai akan usaha dan pengorbanan para pejuang kita pada masa dahulu dalam mempertahankan tanah air tercinta. Melalui semangat ini, kita dipanggil untuk menghargai kemerdekaan yang telah diperoleh, serta untuk memupuk semangat patriotisme dalam membina masa depan negara. Melalui artikel-artikel yang terdapat di buletin ini, kita melanjutkan perjuangan dengan menghormati sejarah kita, merayakan pencapaian kita, dan menghadapi masa depan dengan optimisme. Semangat kemerdekaan adalah sebagai satu tanda bahawa kita semua memiliki peranan untuk dimainkan dalam membina negara yang makmur, adil, dan bersatu.

Semoga edisi khas e-Buletin ini dapat dimanfaatkan sebaik-baiknya oleh kita semua. Bagi edisi-edisi yang akan datang, harapan saya agar warga JSKM terus menyokong penerbitan ini dengan berkongsi idea-idea melalui sumbangan karya, artikel, dan bahan terbitan lain.

Selamat membaca.

Wabillahitaufik Walhidayah, Assalamualaikum W.B.T.
Sekian, Terima kasih.



Tulus ikhlas:
Ts. Dr. Rozita binti Kadar
Koordinator
Jabatan Sains Komputer dan Matematik

Logo, Tema dan Lagu Hari Kebangsaan ke-66

Jalur

Melambangkan lima jari dengan jalur merah dan putih merupakan simbolisme kepada Rukun Negara yang mendasari ideologi Malaysia.

Bulatan

Dalam lingkungan warna biru melambangkan permuafakatan dan perpaduan dalam kalangan rakyat.

Bulan Sabit

Melambangkan simbol agama Islam sebagai agama Persekutuan.



MALAYSIA MADANI

TEKAD PERPADUAN PENUHI HARAPAN

Bintang

Berbucu 14 melambangkan perpaduan dalam kalangan 13 buah negeri dan Wilayah Persekutuan.

Malaysia Madani:

Tekad Perpaduan Penuhi Harapan

Tema ini mendasari tekad pemimpin bersama rakyat bagi memastikan Malaysia sebagai sebuah negara bangsa yang mempunyai semangat perpaduan yang tinggi, bersatu padu, aman dan sejahtera

Biru

Mendasari apresiasi jalinan budaya perpaduan nasional masyarakat Malaysia yang berbilang kaum.

Merah

Tanda semangat jati diri rakyat Malaysia yang mendukung semangat wira yang membara.

Kuning

Pada anak bulan dan bintang adalah tanda negara ini dinaungi oleh Raja Berperlembagaan

Putih

Tanda keikhlasan dan keamanan sebuah negara bangsa yang merdeka

Hitam

Keyakinan rakyat terhadap kemajuan kehidupan dalam citra Malaysia yang unik.

Lagu Tema 2023

Tajuk: Tekad Perpaduan Penuhi Harapan

Penyanyi: Khai Bahar & Aina Abdul

Lirik dan Lagu: Affan Mazlan



Takkan pernah ku jauh
Sentiasa ku teguh
Pertahankan tanah airku
Panas hujan ku tempuh
Penuhi harapanku
Negaraku gagah bersatu

Tekad Perpaduan Penuhi Harapan
Cintai Malaysia
Demi Malaysia
Laungkan bersama
Cintai Malaysia

Walau berbeza warna
Kita semua sama
Bersatu kita takkan goyah
Negaraku Madani
Perpaduan di hati
Selamanya ku Malaysia

Laungkan bersama
Demi Malaysia
Penuhi tekad harapan kita
Ini negara kita
Cintai Malaysia

Cintai Malaysia
Selamanya

Sumber:

https://dbook.penerangan.gov.my/dbook/dmdocuments/logo_tema_hkhm_2023/mobile/index.html

<https://www.youtube.com/watch?v=0Zhws2zs8gs>

Infografik Sejarah Pembukaan Malaysia

Syarifah Adilah Mohamed Yusoff
Azlina Mohd Mydin

• 24 Ogos 1961

Mesyuarat pertama MSCC diadakan di Jesselton

• 16 Oktober 1961

Dewan Rakyat meluluskan gabungan

• 20 Nov 1961

Perbincangan di antara KL dan British

• Dis 1961

PKI- membantah penubuhan Malaysia. 'a NEO-colonialism'

• 16 Jan 1962

Cobbold Commission dilantik

• 19 Feb - 17 Apr 1962

Lord Cobbold Commission melawat Sabah Sarawak

• 27 Mei 1961

Tunku mencadangkan idea Malaysia

• 3 Jun 1961

Lee Kuan Yew setuju

• 23 Ogos 1961


Persetujuan secara prinsip Malaya-Singapura

• Nov 1961

Lawatan 7 pemimpin UNKO ke Kuala Lumpur membincangkan gagasan

• 27 Nov 1961

Referendum Bill diluluskan di Singapura. 71% menyokong





- **Jun 1962**
Filipina menuntut Sabah
- **23 Julai 1962**
Malaysia Solidarity Consultative Committee ditubuhkan
- **Jan 1963**
Subandario mengumumkan 'Konfrontasi'

- **30 Jan 1963**
Inter-Gov Committee (IGC) ditubuhkan
- **9 Julai 1963**
Perjanjian Persekutuan Malaysia ditandatangani di London

Wujud protes dari Indonesia dan Filipina. Penubuhan Malaysia ditangguhkan untuk membenarkan PBB mendapat pandangan rakyat Borneo

- **31 Jan 1963**
Lee Kuan Yew mendeklarasi Singapura Merdeka
- **16 Ogos - 5 Sep 19623**
PBB menjalankan lawatan ke Sabah dan Sarawak mendapatkan pandangan

- **14 Sep 1963**
Pasukan PBB mengesahkan sokongan Sabah dan Sarawak
- **16 Sep 1963**
Singapura, Sabah dan Sarawak bergabung dengan Malaya untuk mewujudkan Malaysia



MEMORI BULAN KEMERDEKAAN 2022

NURHAFIZAH AHMAD

AKTIVITI BERSAMA SOLEH DAN SOLEHAH.

"Semangat Kebangsaan hendaklah dijadikan baja bagi menyuburkan kemerdekaan yang kita capai." Menerusi petikan kata – kata daripada Perdana Menteri Malaysia yang pertama, Tunku Abdul Rahman, bulan kemerdekaan memainkan peranan penting dalam menyuburkan semangat Kebangsaan, membentuk sifat cintakan negara, menyemai nilai-nilai perpaduan, dan memupuk semangat patriotik di antara generasi muda dan masyarakat secara keseluruhan.



Di peringkat sekolah, pelbagai aktiviti telah dijalankan oleh para guru, antaranya pelancaran bulan kemerdekaan, nyanyian lagu patriotik, kibar Jalur Gemilang, pertandingan pakaian beragam, pertandingan basikal hiasan dan lain – lain lagi.

Melalui aktiviti seperti ini, semangat cintakan negara akan tersemat kukuh dalam hati kanak – kanak. Sebagai ibu bapa, kami juga tidak melepaskan peluang untuk bersama anak – anak soleh dan solehah untuk menjalankan aktiviti sempena bulan kemerdekaan. Melalui aktiviti yang dijalankan, kami berharap jiwa cintakan negara, menghormati guru, orang tua dan pemimpin, saling bekerjasama dan semangat perpaduan sesama manusia terus sehati dalam diri anak – anak kecil kami. Berikut adalah beberapa aktiviti yang telah dijalankan bersama anak – anak sepanjang bulan kemerdekaan tahun 2022.



Minggu Pertama: Memasang Jalur Gemilang

Ogos 2022, minggu pertama, anak – anak soleh dan solehah bersemangat untuk memasang jalur gemilang di rumah, juga di rumah datuk dan nenek mereka. Penyebab utama memasang bendera kerana di sekolah, taska dan tadika mereka sudah meriah dengan kibaran Jalur Gemilang. Ummi tukang beli bendera, abinya tukang pasang bendera, anak – anak tukang tengok. Ok lah kan. Semangat bekerjasama untuk menjayakan misi memasang Jalur Gemilang.

Minggu Kedua: Kuiz Jalur Gemilang

Ogos 2022, minggu kedua, kami mengadakan pertandingan kuiz untuk anak – anak, daripada empat orang peserta, hanya dua orang sahaja yang layak masuk pertandingan kuiz. Umur lima tahun dan tujuh tahun. Dua beradik lagi, tiga tahun dan setahun, hanya mendengar jawapan abang – abang sebagai ilmu. Hadiah? Tiada hadiah istimewa. Tepuk tangan tanda kemenangan. Asalkan empunya diri tahu kemenangan itu miliknya.

Fauzan (lima tahun) berjaya menjawab satu soalan, warna merah maksudnya BERANI. Dia memang meminati warna merah dan sangat berani. Soalan lain semuanya dijawab oleh abang Fawwaz (tujuh tahun). Jawapan yang ringkas sudah cukup untuk anak kecil berusia tujuh tahun. Ada input dan output yang diterima oleh akal fikirannya. Semoga semangat mengenali dan mencintai sejarah Jalur Gemilang terus berada dalam hati mereka. Gambar di atas (Kenali Jalur Gemilang) merupakan rujukan untuk jawapan lengkap soalan kuiz di atas.



Kenali Jalur Gemilang

Soalan kuiz	Jawapan yang diterima
Berapakah warna Jalur Gemilang	Empat
Apakah maksud: warna kuning?	Kedaulatan Raja
warna biru?	Perpaduan
warna merah?	Berani
warna putih?	Kesucian
bintang pecah 14?	14 Negeri
anak bulan?	Agama Islam

Minggu Ketiga: Menawan Jambatan Tuanku Syed Putra



Dihujung kampung warna – warni, terdapat Jambatan Tunku Syed Putra. Maka bermulalah langkah demi langkah memanjat tangga yang tak terkira berapa jumlah anaknya. Penat? Semestinya. Namun, kepuasan dan kegembiraan anak – anak tatkala berjaya sampai di atas puncak jambatan tak boleh digambarkan dengan kata – kata. Dari atas jambatan, perkampungan nelayan, bangunan LKIM, pengangkutan laut dan sungai menjadi pemandangan bagaikan lukisan. Antara kata – kata semangat yang boleh dibaca sewaktu menaiki dan menuruni tangga ialah "naik dan turun tangga bagus untuk kekuatan stamina" dan "Tahniah anda telah memilih untuk hidup aktif hari ini". Alhamdulillah, kami terasa aktif dan berstamina pada hari tersebut. Misi menawan Jambatan Tuanku Syed Putra bersama soleh dan solehah tercapai.

Ogos 2022, minggu ketiga, kami sekeluarga berada di Kuala Perlis, rutin bulanan menziarahi ibubapa di kampung. Kami mengambil peluang tersebut menjejakkan kaki ke Jambatan Tuanku Syed Putra untuk kali pertama bersama anak – anak soleh dan solehah. Jambatan ini telah dinaiktaraf, dicat semula dengan warna pelangi dan diberi nama Jambatan Tuanku Syed Putra pada tahun 2021. Jambatan ini menghubungkan dua kampung yang terpisah oleh Sungai Kuala Perlis. Jambatan ini hanya untuk pejalan kaki dan penunggang basikal sahaja. Kami mulakan senaman pagi seawal tujuh pagi, berjalan memasuki kampung warna – warni sebelum menemui Jambatan Tuanku Syed Putra. Anak – anak soleh dan solehah sangat teruja melalui lorong – lorong di dalam kampung warna warni yang sangat ceria, sambil menikmati udara segar pagi.



Minggu Keempat: Kibaran Jalur Gemilang & Pakaian Beragam

Ogos 2022, hujung minggu terakhir, kami berkesempatan membawa anak – anak soleh dan solehah mengibar jalur gemilang di sekitar kawasan UiTM dihatiku. Anak – anak sangat teruja apabila dapat menggayakan pakaian tema kemerdekaan sambil mengibarkan jalur gemilang kegemaran mereka. Pakaian tersebut dijahit oleh ibu saudara mereka sempena pertandingan pakaian beragam di sekolah masing – masing.

Semangat kemerdekaan yang dimiliki oleh anak – anak kecil berjiwa besar ini secara tidak langsung menyemarakkan semangat kebangsaan kami sebagai ibubapa. Bendera Malaysia, Jalur Gemilang dikibarkan oleh mereka dengan gaya merdeka, mengelilingi laman perdana. Kemuncak aktiviti pada hari itu, laungan MERDEKA dilaungkan oleh ketua keluarga, disahut dengan suara kuat dan bersemangat oleh anak – anak, memecah kesunyian taman greenation JSKM. Semoga aktiviti seperti ini dapat mengeratkan hubungan kekeluargaan dan menyemarakkan lagi jiwa anak merdeka dikalangan anak – anak kecil yang bakal menjadi pemimpin di masa hadapan.





INI CERITA TOK NEK

NOOR AINA ABDUL RAZAK

Aku melabuhkan punggung sebelah mak. "Mak, cuba mak cerita kisah mak dulu. Masa merdeka dulu. Kut mak ingat." "Kalau merdeka, mak pun tak tau nak cerita apa. Tapi kalau sebelum tu, tok nek hampa ada la cerita." "Tak kisah la. Cuba mak cerita." Mak pun mula memutar kisah lama. Kisah yang pernah diceritakan oleh tok nek. Ingatan mak yang hampir 80 tahun masih kuat. Inilah cerita tok nek yang diceritakan kepada mak lalu disampaikan kepada kami, anak cucu, tanpa jemu.



Duri mengkuang di tepi dan belakang daun.

Kisahnyaaaa.....


Zaman Jepun dulu, pakat dok dalam hutan. Takut Jepun. Bawa padi masuk hutan. Nak makan nasi, tumbuk la padi tu dalam hutan. Kalau ada anak-anak dara pula, disuruh sembunyi di bawah kawah. Ya, kawah besar yang orang kampung masak gulai kawah tu. Takut Jepun punya pasal. Bila keadaan dah selamat, hidup sangat susah. Tok nek jual tikar mengkuang.

Masuk nun jauh ke dalam hutan semata-mata untuk mendapatkan daun mengkuang. Bila bawa balik mengkuang, disusun-susun mengkuang, lalu dikerat kepala dan ekor (bawah dan hujung daun). Kemudian dilayur-layur pula dan dibuang duri yang ada di belakang daun. Lepas tu tok nek jangat (guna alat bernama jangat) mengkuang dan buang sembilu (tepi daun). Hanya yang di tengah dan masih elok diambil untuk dibuat tikar. Selepas dijangat, daun disusun dan ditumbuk-tumbuk. Bukan tumbuk menghancurkan, tetapi untuk melembutkan. Masa ni daun dok hijau lagi.

Dah habis tu, rendam mengkuang tadi dalam pasu besar. Esoknya, tok nek jemur daun-daun tu atas rumput nak bagi kering. Skut keadaan berapa hari yang perlu sampai betul-betul kering. Kemudian diberkas daun-daun tu sebesar dua cekak dewasa lalu ditumbuk lagi untuk melembutkan daun. Akhir sekali, daun mengkuang diurut-urut dan boleh dah dianyam. Tikar mengkuang yang siap, tok nek bawa ke pondok Bukit Besar (La ni ada SMA Nahdzah di situ, kampung aku dilahirkan) untuk dijual. Depa yang ada duit memang beli banyak-banyak. Jika saiznya kecil, tok nek buat tikar sambat (Tikar kecil yang disambung untuk menjadi besar).



Jangat.
(foto dari fb Hati Kampung)



Mak pula buat tikar lampin. Mak kutip sembilu yang dibuang, raut buang duri dan anyam (selepas melalui beberapa proses hingga kering). Tikar lampin dalam saiz kurang satu meter. Mak jual dua kupang satu (dua puluh ser). Biasanya mak kirim kat orang yang pi jual tikar tok nek. Bila nak guna, tikar lampin akan dilipat dua, dialas plastik dan kain untuk bayi-bayi baru lahir. Masa tu mana nak ada tilam baby macam la ni.

“Kalau hang nak tau cerita pasai Kampung Haji Wahab, boleh la mak habag.”

Aku suruh mak cerita ja. Kut kut boleh sambung tulis. Tapi, hujung pangkal aku nak kait pun payah juga. Tak mengapalah. Aku cerita kat kakak-kakak dan adik-adik aku cukup la.

HABBUL-WATAN: THE NATIONAL DAY & THE MALAYSIA DAY

NOR HANIM ABD RAHMAN (Dr.)

Malaysia is well-known for more than only its cultural variety and wealth of natural resources. Additionally, it is a nation that observes official holidays for a number of important and historic occasions. The two significant dates that people of all ages and ethnicities should remember and celebrate are August 31st and September 16th, where the first one is The Independence Day Celebration: The Independence Day of Malaysia, also known as Hari Merdeka, commemorates the country's independence from British colonial rule.

HERE'S A TABLE SUMMARIZING THE SIMILARITIES AND DIFFERENCES BETWEEN INDEPENDENCE DAY AND MALAYSIA DAY THAT WE SHOULD KNOW OF [1]:

	Independence Day	Malaysia Day
Date	August 31, 1957	September 16, 1963
Commemorates	Independence from British colonial rule in 1957	Formation of the Federation of Malaysia in 1963
Significance	Marks the day Malaysia gained independence	Celebrates the formation of Malaysia as a federation
Historical Event	End of British colonial rule in Malaya	Inclusion of Sabah and Sarawak, forming Malaysia
Celebrated	Annually on August 31st	Annually on September 16th
National Holiday	Yes	Yes
Importance	Symbolizes Malaysia's sovereignty and self-determination	Emphasizes unity and multiculturalism in Malaysia
Festivities	Parades, cultural performances, fireworks	Flag-raising ceremonies, parades, cultural celebrations
Educational Emphasis	Included in the national curriculum, taught in schools	Included in the national curriculum, taught in schools
Reflection on History	Reminds of the struggles and sacrifices for independence	Reflects on the formation of Malaysia and its diversity
Cultural and National Identity	Reinforces the sense of Malaysian identity	Celebrates the multicultural nature of Malaysia

Since 1957, Malaysia has celebrated its Independence Day annually on August 31. The day is marked by grand festivities, including parades, cultural performances, and fireworks. It serves as a reminder of Malaysia's journey to independence and its diverse cultural heritage. Today, Independence Day still remains a significant national holiday in Malaysia, symbolizing the country's sovereignty and the aspirations of its people for self-determination and progress. The second date represents The Malaysia Day Celebration: The Federation of Malaysia was established on September 16, 1963, with the inclusion of Singapore, Sabah, and Sarawak. Unfortunately, Singapore separated from Malaysia in 1965, becoming an independent nation until today.

LAST BUT NOT THE LEAST, LET ME FINISH BY QUOTING A FAMOUS NATIONALIST ARABIC PROVERB [2],

"HUBBUL WATAN MINAL IMAN (حب الوطن من الإيمان) STATES THAT LOVE OF ONE'S HOMELAND IS AN ESSENTIAL COMPONENT OF FAITH."



Pictures (personal collections): Malaysia flag,


Nowadays, due to lack of understanding and awareness of the sociopolitical heritage of our beloved country, regrettably there is a range of viewpoints regarding the relevance of Independence Day especially among the younger generation. Some view it as a significant occasion to commemorate the nation's history, achievements, struggles and sacrifices made by their predecessors in achieving independence, while others may have differing levels of interest or prioritize other aspects of national identity and civic engagement.

The lyrics of a well-known Patriotic Malay-song, titled 'Anak Kecil Main Api' :

Anak kecil main api	Masa depan sungguh kelam	Kita sudah tiada masa
Terbakar hatinya yang sepi	Kan lenyap peristiwa semalam	Majulah dengan maha perkasa
Air mata darah bercampur keringat	Tertutuplah hati terkunci mati	Janganlah terlalai teruskan usaha
Bumi dipijak milik orang.	Maruah peribadi dah hilang.	Melayu kan gagah di nusantara
Nenek moyang kaya-raya	Kini kita cuma tinggal kuasa	Melayu kan gagah di nusantara
Tergadai seluruh harta benda	Yang akan menentukan bangsa	Melayu kan gagah di nusantara.
Akibat sengketa sesamalah kita	Bersatulah hati bersama berbakti	
Cinta lenyap di arus zaman.	Pulih kembali harga diri.	
Indahnya bumi kita ini		
Warisan berkurun lamanya		
Hasil mengalir ke tangan yang lain		
Peribumi merintah sendiri.		

References:

[1] OpenAI. ChatGPT. 2023: <https://openai.com>. Accessed [July 6, 2023]
 [2] Maznah Daud. 2016. Pictures (personal collections): Malaysia flag. Accessed [Aug.23, 2023]



Pesanan Pemimpin Buat Rakyat Malaysia Merdeka

NORAZAH BINTI UMAR

Detik 31 Ogos 1957 akan selalu diukir dalam sejarah sebagai momen yang menggetarkan bagi Persekutuan Tanah Melayu. Pada hari yang bersejarah ini, pengisytiharan kemerdekaan pertama bagi Persekutuan Tanah Melayu diumumkan oleh Tunku Abdul Rahman Putra pada pukul 12.00 tengah malam di Padang Kelab Selangor, Kuala Lumpur. Namun, semangat kemerdekaan tidak berhenti di situ. Pengisytiharan rasmi diadakan pada 31 Ogos 1957, tepat pukul 9.30 pagi di Stadium Merdeka. Momentum bersejarah ini mencapai puncaknya dengan laungan gemuruh 'Merdeka' yang dipimpin oleh Tunku Abdul Rahman dan disertai oleh seluruh rakyat Tanah Melayu yang bersemangat di Stadium Merdeka. Laungan ini tidak hanya menjadi satu ungkapan semangat, tetapi ia juga menjadi simbol perjuangan, hasrat, dan tekad untuk mencapai kemerdekaan. Setiap tahun, laungan 'Merdeka' ini terus menggema, mengingatkan kita akan perjuangan dan pengorbanan yang membawa kepada kebebasan ini.

Setiap pemimpin, bermula dengan perdana menteri pertama Malaysia dan yang seterusnya, membawa bersama mereka misi, visi, dan harapan untuk negara ini. Mereka bekerja keras untuk menjaga dan memperkuat kemerdekaan yang telah dicapai, sambil terus berusaha untuk membangun sebuah negara yang maju dan sejahtera. Justeru itu, penting bagi kita untuk merenungkan pesanan yang pernah diungkapkan oleh para pemimpin kita agar ianya dapat mendorong kita untuk terus menghargai kemerdekaan, bekerja bersama demi masa depan yang lebih baik, dan menyemarakkan semangat patriotisme dalam diri kita. Seiring berjalannya waktu, semoga semangat kemerdekaan ini terus tumbuh dan menginspirasi generasi-generasi mendatang untuk menjaga api perjuangan terus berkobar, demi negara yang merdeka, bersatu, dan maju.'





TUNKU ABDUL RAHMAN PUTRA AL-HAJ IBNI ALMARHUM SULTAN ABDUL HAMID SHAH

Almarhum Tunku Abdul Rahman Putra Al-Haj merupakan anak lelaki yang ketujuh dan anak yang kedua puluh kepada Sultan Abdul Hamid Halim Shah, Sultan Kedah yang ke-24. Tunku merupakan Ketua Menteri Persekutuan Tanah Melayu dari 1955, dan Perdana Menteri pertama sejak kemerdekaan pada tahun 1957 sehingga 1970. Pembentukan Malaysia pada tahun 1963 merupakan satu daripada pencapaiannya yang teragung. Beliau juga dikenang sebagai 'Bapa Kemerdekaan' dan 'Bapa Malaysia'.

SUMBER: WIKIPEDIA

"MULAI 31 OGOS 1957, (KITA) AKAN MENJADI SEBUAH NEGARA BERDAULAT DAN DEMOKRATIK UNTUK SELAMA-LAMANYA, YANG DIBINA BERDASARKAN PRINSIP KEBEBASAN DAN KEADILAN SERTA SENTIASA MEMPERJUANGKAN KEBAJIKAN DAN KESEJAHTERAAN RAKYATNYA."

(PENGISYTIHARAN KEMERDEKAAN, 1957)

"...MERDEKA ITU BUKANLAH SUATU BENDA YANG MUDAH BOLEH DIDAPAT, MELAINKAN IALAH DIKEHENDAKI UNTUK MENDAPATKANNYA ITU IAITU PENGORBANAN YANG SEBENAR PENGORBANAN. DENGAN KERANANYA KITA TERPAKSA MENGORBANKAN, BUKAN SAHAJA WANG RINGGIT DAN USAHA TENAGA BAHKAN JIWA KITA SENDIRI JUGA..."

(JPM,2015)

"KEMERDEKAAN IBARAT OBOR YANG MENYALA. MARILAH KITA JULANG OBOR INI SETINGGI-TINGGINYA DENGAN BANGGA SUPAYA CAHAYANYA DAPAT MENERANGI SEKITAR ALAM".

(BH 1&3 OGOS 2009)

"RAKYAT DENGAN HATI YANG TABAH HENDAKLAH MENEGAKKAN SATU BANGSA DAN SATU NEGARA, MEMANDANG KE HADAPAN DENGAN PENUH KEYAKINAN AKAN MENCAPAI KEAMANAN DAN KEMAKMURAN, KESENTOSAAN DAN KEBAHAGIAAN".

(BH 7 OGOS 2009)



TUN HAJI ABDUL RAZAK BIN DATO' HUSSEIN AL-HAJ



Tun Abdul Razak adalah tokoh penting dalam perjuangan kemerdekaan Malaysia dan pembangunan negara setelah mendapatkan kemerdekaan. Merupakan perdana menteri Malaysia ke-2 mulai 1970 hingga 1976, beliau memainkan peranan utama dalam membawa Malaysia keluar dari masa transisi pasca kemerdekaan menuju pembangunan dan kemakmuran ekonomi. Dia juga mendirikan konsep "Rancangan Malaysia" yang bertujuan untuk mengembangkan ekonomi dan memerangi kemiskinan.

SUMBER: WIKIPEDIA

"MERDEKA BERMAKNA JANJI MASA DEPAN. MARILAH KITA MENGGUNAKAN HARI INI, TAHUN DEMI TAHUN, UNTUK MENGUKUR DIRI KITA SENDIRI DAN NEGARA KITA, SERTA MEMASTIKAN KITA BERGERAK MAJU DAN BERKEMBANG MENJADI SEBUAH BANGSA YANG ANAK-ANAK KITA DAN CUCU-CUCU KITA AKAN BANGGA, AGAR PADA TAHUN-TAHUN MENDATANG SAAT MEREKA MERAYAKANNYA SENDIRI, DALAM KETIADAAN KITA, MEREKA DAPAT BERKATA DENGAN KEBANGGAAN DI DALAM HATI MEREKA BAHWA KITA TIDAK MENGECEWAKAN MEREKA."

(ARKIB NEGARA MALAYSIA: UCAPAN KEMERDEKAAN 1960)

"KEMAJUAN DAN PEMBANGUNAN YANG SEBENAR-BENARNYA BAGI SESUATU BANGSA ITU TERLETAK DI ATAS RAKYAT NEGARA ITU SENDIRI DAN DI ATAS USAHA SERTA TENAGA YANG MEREKA CURAHKAN DALAM KERJA MEREKA SEHARI-HARI".

(ARKIB NEGARA MALAYSIA: UCAPAN PEMBUKAAN MESYUARAT PENOLONG PEGAWAI PEMBANGUNAN LUAR BANDAR, 1960)

"KITA MEMIKIR APAKAH SUMBANGAN YANG PATUT KITA BERI KEPADA NEGARA DAN JANGANLAH KITA SEMATA-MATA MEMIKIRKAN APA FAEDAH KITA PATUT DAPAT DARIPADA KERAJAAN DAN NEGARA.

(BH 9 OGOS 2009)

"MEMUPUK TAAT SETIA DAN TIDAK BERBELAH BAGI DAN MEMAHAMI HAK SERTA KEISTIMEWAAN MASING-MASING MENJADI TANGGUNGJAWAB UTAMA RAKYAT KEPADA NEGARA".

(BH 11 OGOS 2009)



TUN DR. MAHATHIR BIN MOHAMAD

Tun Dr. Mahathir dilahirkan pada 10 Julai 1925. Beliau ialah seorang doktor dan lebih popular dengan gelaran "Dr. M" atau "Tun M". Beliau merupakan Perdana Menteri Malaysia yang ke 4 dan juga ke 6 sekaligus menjadikan beliau pemimpin dengan tempoh pimpinan terpanjang dalam sejarah Malaysia. Beliau digelar sebagai "Bapa Pemodenan Malaysia" kerana menjadi seorang negarawan yang banyak berjasa kepada Malaysia sehingga menjadikan Malaysia sebuah negara moden, makmur, ceria dan penuh bertenaga. Amat dikenali kerana reformasi ekonomi dan modernisasi yang dipimpinnya iaitu "Vision 2020", yang bertujuan menjadikan Malaysia sebagai negara maju pada tahun 2020.

SUMBER: WIKIPEDIA

***'JIKA KITA TIDAK BERAMANAH SUDAH TENTU SEGALA KERJA TIDAK AKAN SEMPURNA DAN MATLAMAT TIDAK AKAN TERCAPAI. JIKA KITA MENJADI SATU BANGSA YANG TIDAK BERAMANAH, MAKA MUSTAHIL BAGI KITA MEMBANGUNKAN NEGARA UNTUK KEPENTINGAN JANGKA PANJANG KITA SENDIRI'.
(KOLEKSI ARKIB UCAPAN KETUA EKSEKUTIF, PERUTUSAN HARI KEBANGSAAAN 1984)***

***'PENDEKATAN YANG PALING BERKESAN MENGHADAPI PENJAJAHAN CARA BARU INI, IALAH MELALUI PENGUASAAN ILMU PENGETAHUAN DALAM SEMUA BIDANG TERMASUK AGAMA DAN MELENGKAPKAN DIRI DENGAN SEGALA KEMAHIRAN. JUSTERU ITU, KITA BOLEH MENGHALAKAN NASIONALISME KITA KEPADA PENCAPAIAN ILMU PENGETAHUAN DAN SEGALA KEMAHIRAN YANG BERMANFAAT BAGI MENGEKALKAN KEBEBASAN KITA, SERTA MARUAH DAN KEUTUHAN AGAMA, BANGSA DAN NEGARA'.
(KOLEKSI ARKIB UCAPAN KETUA EKSEKUTIF, PERUTUSAN HARI KEBANGSAAAN, 1985)***

'KEMERDEKAAN YANG DICAPAI CUMA AKAN BERMAKNA HANYA APABILA KITA BERJAYA MENGHAKIS GENGGMAN NEOKOLONIALISME ATAU PENJAJAHAN EKONOMI YANG MENCEMAR KEMERDEKAAN KITA'.

'WALAUPUN MALAYSIA MEMPUNYAI LEBIH BANYAK BANGSA DAN SUKU KAUM, TETAPI IANYA TETAP AMAN DAN STABIL DAN MEMBANGUN DENGAN PESATNYA SEHINGGA DIKENALI SEBAGAI HARIMAU ASIA'.

(ASTRO AWANI, 2018)

RUKUN NEGARA MALAYSIA, MASIHKAH ANDA MENGHAYATINYA?

Syarul Heiry Bin Yahaya

Pada 31 Ogos 1970 Rukun Negara telah diisytiharkan bersempena ulangtahun kemerdekaan Malaysia yang ke-13 oleh Seri Paduka Baginda Yang di-Pertuan Agung Almarhum Tuanku Ismail Nasiruddin Shah Ibni Almarhum Sultan Zainal Abidin, Yang di-Pertuan Agung IV. Berikutan dengan peristiwa yang melemahkan perpaduan antara kaum di Malaysia, iaitu peristiwa 13 Mei 1969 maka Rukun Negara diperkenalkan. Tujuan utama Rukun Negara dibentuk adalah untuk membentuk perpaduan yang kukuh. Di dalam Rukun Negara itu sendiri mempunyai prinsip-prinsip yang merupakan kunci keharmonian dan perpaduan kaum untuk kejayaan dan kestabilan negara Malaysia.

Tahukah anda Rukun Negara terbahagi kepada dua bahagian? Bahagian yang pertama adalah menggariskan objektif masyarakat Malaysia yang mahu dibentuk, manakala yang kedua pula menggariskan lima prinsip Rukun Negara.

Rukun Negara adalah satu doktrin untuk mencapai perpaduan kaum demi keharmonian dan kemakmuran negara Malaysia. Ia juga bercita-cita melahirkan masyarakat Malaysia yang demokratik, saintifik, progresif serta bersatu padu dan bersikap terbuka terhadap pelbagai cara hidup rakyat pelbagai kaum, agama dan budaya. Cita-cita ini akan tercapai apabila objektif Rukun Negara diamalkan oleh setiap rakyat negara ini.

Antara objektif Rukun Negara adalah:

1. Mencapai perpaduan yang lebih erat dalam kalangan seluruh masyarakatnya. Rakyat Malaysia terdiri dari pelbagai kaum, adat resam, budaya yang pelbagai, dan pasti wujud pandangan yang berbeza daripada segala sudut dan persoalan. Tambahan pula, terdapat ketidakseimbangan ekonomi antara kaum di Malaysia. Melalui penghayatan Rukun Negara akan dapat membentuk satu bangsa yang bersatu padu di mana semua rakyat tanpa mengira kaum mempunyai semangat kesetiaan dan perasaan cinta terhadap negara tanpa mengira kaum, agama, adat resam, budaya dan fahaman politik.
2. Memelihara satu cara hidup berdemokrasi. Perlembagaan negara memberi jaminan kebebasan hak asasi dan kebebasan kegiatan-kegiatan berpolitik di negara asalkan tidak disalahguna atas nama demokrasi untuk membakar semangat perkauman bagi mamusnahkan sistem demokrasi negara serta melanggar undang-undang negara. Kepentingan bangsa dan negara perlulah diutamakan dan kepentingan negara hendaklah diutamakan melebihi kepentingan peribadi.
3. Mencipta satu masyarakat yang adil di mana kemakmuran negara akan dapat dinikmati bersama secara adil dan saksama. Semua rakyat tanpa mengira bangsa, keturunan dan ideologi mempunyai peluang yang sama untuk menikmati kekayaan negara. Individu yang kurang berkemampuan akan dibantu supaya mereka mempunyai peluang yang sama utk bersama dengan individu atau pihak yang lebih maju.
4. Menjamin satu cara yang liberal terhadap tradisi-tradisi kebudayaan yang kaya dan pelbagai corak. Masyarakat Malaysia bebas mengamalkan agama, adat resam dan kebudayaan masing-masing sesuai dengan matlamat perpaduan negara yang mempunyai pelbagai kaum. Walaupun terdapat kepelbagaian tersebut, semua rakyat perlu menerima kelainan ini sebagai satu kekayaan kepada negara.
5. Membina satu masyarakat progresif yang akan menggunakan sains dan teknologi moden. Dunia kini sedang menyaksikan perubahan yang begitu cepat dalam pelbagai bidang ilmu pengetahuan, sains dan teknologi. Masyarakat progresif yang hendak diwujudkan merupakan satu masyarakat yang bergerak maju sejajar dengan kemajuan sains dan teknologi yang akhirnya akan menjadikan Malaysia sebuah negara yang maju dan tidak terkeluar daripada batas-batas agama dan nilai-nilai keagamaan.



Rukun Negara merupakan aspek yang penting dalam perpaduan negara, ia penting kerana tanpa perpaduan sesebuah negara itu akan menjadi lemah sukar untuk dibangunkan dan mudah diancam samada dari kuasa luar atau dalam negara itu sendiri. Lima prinsip Rukun Negara yang perlu kita hayati adalah seperti berikut:

- 1.Kepercayaan Kepada Tuhan. Memberi maksud agama adalah sebagai pegangan utama rakyat Malaysia. Agama Islam adalah agama rasmi Persekutuan Malaysia dan agama yang lain boleh dianuti oleh rakyat. Prinsip yang pertama ini dapat melahirkan rakyat yang menghormati amalan beragama masyarakat yang lain. Secara tidak langsung dapat menyatupadukan masyarakat Malaysia yang berbilang kaum.
- 2.Kesetiaan Kepada Raja dan Negara. Malaysia mengamalkan system Demokrasi Berparlimen dan Raja Berpelembagaan dengan Seri Paduka Baginda Yang di-Pertuan Agong sebagai Ketua Negara. Ini bermaksud bahawa setiap warganegara hendaklah menumpukan sepenuh taat setia, jujur dan Ikhlas kepada Seri Paduka Baginda Yang di-Pertuan Agong manakala Raja atau pemerintah harus menyediakan perlindungan kepada negara dan seluruh rakyat jelata.
- 3.Keluhuran Perlembagaan. Ini membawa maksud Perlembagaan Persekutuan merupakan undang-undang tertinggi negara dan tiada institusi yang dapat mengatasi ketertinggian Perlembagaan Persekutuan. Perlembagaan bertanggungjawab menjaga hak rakyat serta menjamin kemakmuran dan perpaduan negara.
- 4.Kedaulatan Undang-undang. Sebagai warganegara kita hendaklah menghormati Perlembagaan Persekutuan dan mematuhi segala peraturan yang telah ditetapkan. Undang-undang dapat menjamin keadilan serta keamanan kerana setiap rakyat tertakluk pada pelaksanaan undang-undang iaitu semua rakyat adalah sama di sisi undang-undang,
- 5.Kesopanan dan Kesusilaan. Prinsip yang kelima bermaksud amalan nilai murni yang melambangkan keperibadian rakyat Malaysia. Rakyat yang bersopan santun dan bertatasusila dapat membentuk masyarakat yang bersatu padu, Prinsip ini menjadi panduan supaya perilaku masyarakat sentiasa terpelihara dan berkembang sesuai dengan keperibadian bangsa dan nilai-nilai murni.

Seluruh rakyat Malaysia perlu menghayati dan mengamalkan Rukun Negara sebagai satu cara hidup dalam masyarakat yang majmuk dan bukan sekadar menghafalnya sahaja. Penghayatan dan pemahaman berkenaan Rukun Negara akan memelihara keharmonian dan kesejahteraan rakyat Malaysia. Ianya bukan sahaja dapat mengukuhkan jati diri kita sebagai rakyat Malaysia akan tetapi dapat menyemaikan semangat patriotik di dalam diri secara tidak langsung membudayakan sikap toleransi di antara kaum yang berbilang bangsa.

Sumber: a) <https://www.malaysia.gov.my/portal/content/30110?language=my>

b) <https://www.sinarharian.com.my/article/247509/suara-sinar/analisis-sinar/prinsip-rukun-negara-semakin-dilupakan>

c) <https://www.utusan.com.my/commentary/nilai-sebuah-rukun-negara/>

PENGALAMAN MENYAKSIKAN SAMBUTAN HARI KEBANGSAAN 2019 BERSAMA KELUARGA DI PUTRAJAYA

Siti Asmah Mohamed



Tanggal 31 Ogos 1957 merupakan hari yang amat bermakna kepada seluruh rakyat Malaysia tanpa mengira bangsa dan agama. Hal ini demikian kerana, pada tarikh keramat inilah negara kita telah mencapai kemerdekaan. Mengimbas kembali tahun 2019, sebelum Malaysia dilanda pandemik akibat wabak koronavirus (Covid-19), kami sekeluarga berpeluang menyaksikan sambutan hari bersejarah negara secara langsung. Kebiasaannya, kami hanya menonton acara sambutan Hari Kemerdekaan di kaca televisyen sahaja.

Pengalaman pertama membawa anak-anak menyaksikan sambutan Hari Kebangsaan secara lebih dekat merupakan suatu pengalaman baharu dan bermakna buat mereka meskipun mereka belum memahami sepenuhnya erti kemerdekaan. Maka sebagai ibu bapa, adalah menjadi tanggungjawab kita untuk memberi pendedahan dan pemaknaan merdeka kepada anak-anak di peringkat awal.

Tidak ada yang lebih menggembirakan selain daripada berkongsi pengalaman baharu di samping menyuntik semangat cintakan tanah air ke dalam diri anak-anak. Istimewanya Hari Kebangsaan pada tahun 2019, Putrajaya dipilih sebagai lokasi sambutan dan telah menjadi tuan rumah bagi keraian Hari Kebangsaan untuk kali yang keempat. Sambutan Hari Kebangsaan di Putrajaya kali keempat ini juga menyaksikan Yang di-Pertuan Agong baharu, Al-Sultan Abdullah Ri'ayatuddin Al-Mustafa Billah Shah mencemar duli menghadiri acara perbarisan dan perarakan pada hari tersebut. Putrajaya dibanjiri dengan ribuan orang dan suasana amat meriah dengan pelbagai aktiviti dan acara bersempena dengan sambutan kemerdekaan yang bertemakan, "Sayangi Malaysiaku: Malaysia Bersih".

Pada hari bersejarah tersebut, kami sekeluarga berkesempatan mendapat tempat penonton yang strategik, iaitu di bahagian barisan paling hadapan di Dataran Putrajaya. Berada di barisan hadapan memudahkan kami untuk menyaksikan acara sambutan kemerdekaan dengan lebih jelas. Tepat jam 7.30 pagi, dif-dif kehormat telah mengambil tempat duduk di atas pentas utama. Upacara dimulakan dengan nyanyian lagu "Negaraku" diikuti dengan lagu-lagu patriotik. Bendera Jalur Gemilang kemudiannya dinaikkan dan berkibar megah di angkasa. Acara kemudiannya dilanjutkan dengan ucapan oleh Perdana Menteri pada ketika itu, Tun Dr. Mahathir Mohamad dan ucapannya diakhiri dengan laungan "Merdeka" sebanyak tujuh kali. Seluruh warga Malaysia yang hadir menyahut laungan "Merdeka" itu dengan penuh rasa patriotisme sambil mengibarkan bendera Jalur Gemilang. Anak-anak tidak terkecuali, mereka juga turut melaungkan "Merdeka" dengan teruja dan bersemangat. Kemeriahan dan kehangatan sambutan kemerdekaan yang ke-62 ini dapat diperhatikan pada segenap lapisan masyarakat yang berada di Dataran Putrajaya pada ketika itu.

Acara kemudiannya bersambung dengan perbarisan lintas hormat yang diketuai oleh pasukan pancaragam diikuti oleh pasukan beruniform seperti pasukan polis, tentera, bomba, murid-murid sekolah, kakitangan kerajaan dan kumpulan pejuang veteran negara. Pasukan-pasukan yang berarak kelihatan bergaya dan gagah dengan pakaian seragam masing-masing. Jentera-jentera aset negara, pasukan berkuda dan anjing polis juga turut sama-sama memeriahkan perarakan tersebut. Perarakan kereta berhias antara lain membangkitkan suasana ceria dan rasa kagum terhadap kreativiti hiasan yang ditampilkan sebagai menzahirkan rasa cinta kepada negara.

Perkara yang paling memukau kami sekeluarga sepanjang berada di sambutan Hari Kebangsaan di Putrajaya adalah pertunjukan terbang lintas pesawat udara. Pertunjukan udara ini melibatkan lebih daripada 284 aset milik pasukan keselamatan dan ketenteraman awam negara yang membabitkan Polis Diraja Malaysia (PDRM), Angkatan Tentera Malaysia (ATM), Jabatan Bomba dan Penyelamat Malaysia (JBPM) serta Agensi Penguatkuasaan Maritim Malaysia (Maritim Malaysia). Kami begitu teruja melihat beberapa aksi pesawat berlainan jenis berterbangan di udara serta jet-jet pejuang yang meluncur laju sambil mempamerkan aksi akrobatik yang kemas dan mendebarkan. Kami sempat merakamkan detik-detik yang mengagumkan ini sebagai tanda kenang-kenangan.

Acara sambutan Hari Kebangsaan yang ke-62 berakhir sekitar jam 11 pagi. Anak-anak begitu teruja dapat menyaksikan kesemua acara sambutan Hari Kebangsaan 2019 secara langsung sepertimana yang ditonton di kaca televisyen pada tahun-tahun yang sebelumnya. Kami sekeluarga gembira kerana dapat merasai pengalaman yang berharga ini dan amat bangga menjadi rakyat Malaysia. Pengalaman membawa anak-anak menyaksikan sambutan Hari Kebangsaan juga merupakan salah satu cara untuk meluangkan masa yang berkualiti dengan keluarga di samping mensyukuri nikmat merdeka dan kebebasan yang dikecapi selama ini. Sayangi Malaysiaku!



SEMANGAT PATRIOTISME MAKIN PUDAR

31 AUGUST
HARI MERDEKA
MALAYSIA INDEPENDENCE DAY

Muniroh Hamat

Patriotisme adalah sikap mental dan tingkahlaku individu atau masyarakat dan ianya merujuk kepada kesetiaan kepada bangsa dan negara. Ianya perlu dipupuk dan dihayati oleh segenap lapisan masyarakat terutamanya golongan remaja. Remaja merupakan golongan yang mendukung nasib bangsa dan hala tuju sesebuah negara. Pada zaman ini, kita telah dilimpahi dengan pelbagai nikmat dan kesenangan hasil daripada pengorbanan dan jerih perih yang dilalui oleh para pejuang dan rakyat demi mencapai kemerdekaan yang diimpikan. Semangat patriotisme ini didapati semakin pudar dalam kalangan para remaja. Terdapat beberapa faktor penyumbang kepada kurangnya semangat patriotisme ini.

Antaranya:

1) Penting Diri Sendiri

Urusan kerjaya dan kesibukan aktiviti harian menjadi lebih penting menyebabkan mereka tidak menghiraukan perkara lain. Maka kesibukan menambah hasil pendapatan dan kekayaan menjadikan mereka kurang memberi tumpuan, perhatian, semangat dan penghayatan patriotisme. Aktiviti seperti kempen kesedaran dan sambutan hari kemerdekaan kurang mendapat sambutan dalam kalangan remaja.

2) Tiada Perasan Cintakan Negara

Masyarakat masa kini terutamanya remaja kurang disemai dengan nilai-nilai cintai negara. Kurangnya pendedahan tentang perjuangan dan pengorbanan serta jasa golongan terdahulu. Kita juga tidak merasai kesusahan hidup semasa zaman penjajahan dahulu.

3) Terpengaruh Budaya Barat

Walaupun kemerdekaan sudah dikecapi selama 66 tahun, sudah bebas dari jajahan kuasa barat, namun secara tidak sedar, mereka sebenarnya sudah menguasai kita. Tidak lagi penjajahan dengan kuasa tapi dengan budaya mereka. Budaya barat banyak mempengaruhi pemikiran dan gaya hidup kita. Cara berpakaian, pergaulan yang bebas serta aktiviti yang mendorong kepada gejala sosial makin bertambah. Budaya dan semangat patriotisme terhadap negara sendiri tidak lagi diberi perhatian.

4) Kurang Menghayati Perjuangan Tokoh-Tokoh Tempatan

Generasi muda adalah pendukung masa depan negara. Mereka terdiri daripada golongan remaja perlulah menaikkan semangat patriotisme dalam diri sendiri dan lebih memahami erti pengorbanan dan kemerdekaan agar dapat mendukung dan menjulang nama bangsa dan negara di persada dunia. Tokoh-tokoh tempatan yang dulu terkenal telah kurang dikenali dalam kalangan masyarakat. Pihak kerajaan dan media massa seharusnya memberi pendedahan atas jasa tokoh-tokoh tempatan agar mereka tidak dilupakan oleh generasi akan datang.


5) Patriotisme Berasaskan Kaum

Kaum di Malaysia terdiri dari masyarakat majmuk dari pelbagai kaum. Kepelbagaian kaum seharusnya bukan menjadi faktor dalam mencapai kesepakatan dan perpaduan. Semangat patriotisme ini haruslah berasaskan kepada semangat setia dan cinta akan negara. Kaum, bangsa mahupun agama seharusnya bukan menjadi penghalang kerana kita semua bersatu dan menjadi rakyat Malaysia. Kita perlulah berasa bangga dengan negara kita kerana walaupun dalam kepelbagaian bangsa dan agama, kita masih hidup dalam keadaan aman dan damai. Dengan memahami dan menghayati semangat patriotisme, hubungan sesama kaum akan lebih erat, dapat menyatupadukan semua kaum dan mengutuhkannya perpaduan.

Kesimpulannya, memupuk dan mengekalkan semangat cinta akan negara dalam masyarakat akan dapat melahirkan negara yang aman dan damai. Sesungguhnya anasir luar atau musuh negara amat menyukai jika rakyat Malaysia tidak mempunyai semangat patriotisme. Apabila rakyat Malaysia tiada sikap cinta akan negara, pastinya negara akan mudah ditakluki oleh negara yang ingin menjajah lagi negara kita. Dengan mengwujudkan perpaduan dan semangat patriotisme, rakyat akan bekerja tanpa malas, bertanggungjawab dan bersungguh-sungguh agar dapat menyumbang ke arah pembangunan negara. Keamanan pada negara ini akan mendorong lebih ramai pelabur asing membuka perniagaan di Malaysia sekaligus dapat membuka peluang pekerjaan serta meningkatkan lagi taraf hidup rakyat dan perkara tersebut dapat membantu negara kita akan terus maju. Di samping itu, keharmonian antara kaum akan dapat ditingkatkan. Seterusnya suasana harmoni ini akan dapat merangsang perkembangan sektor pelancongan negara.

Kenali Tokoh Pejuang Kemerdekaan

Ts Jamal Othman



HAJI ABDUL RAHMAN ABDUL HAMID

Tok Limbong atau Abdul Rahman Limbong merupakan salah satu nama besar dalam sejarah Melayu Terengganu. Selain memimpin gerakan yang dikenali sebagai “Pemberontakan Tani Terengganu”, Tok Limbong juga terkenal sebagai seorang ulama dan pendakwah yang dihormati, ahli perniagaan dan pengusaha yang berjaya dan seorang petani yang gigih.



MAT KILAU

Mat Kilau bin Imam Rasu dipercayai lahir dalam tahun 1865/1866 di Kampung Masjid, Pulau Tawar, Jerantut, Pahang. Mat Kilau amat mahir di dalam ilmu kebatinan, persilatan dan bermain senjata. Beliau mempunyai sifat-sifat seorang pemimpin dan pemikiran yang matang telah menjadikan beliau seorang pemuda yang sangat disegani dan dihormati oleh penduduk negeri Pahang. Segala cabaran yang berjaya dilalui oleh Mat Kilau semasa menentang pihak British membuatkan pelbagai pihak menyanjung tinggi kepahlawanan beliau.



MAT SALLEH

Datu Mat Salleh merupakan pejuang Sabah yang terkenal dalam memberi tentangan yang hebat kepada penjajahan Inggeris di Sabah. Detik perjuangan Datu Mat Salleh menentang pencerobohan dan keganasan Kompeni Hindia Timur Inggeris bermula pada bulan Julai 1897. Dalam masa pertempuran itu, Mat Salleh yang telah mengetuai pemberontakan selama enam tahun menemui ajalnya pada 31 Januari 1900.





DATO' MAHARAJA LELA PANDAK LAM

Dato' Maharaja Lela Pandak Lam ialah seorang pembesar kelapan Perak. Beliau adalah anak Raja Bugis yang berasal dari Sulawesi. Semasa pemerintahan Sultan Muzaffar Shah III, beliau datang ke Perak dan dilantik sebagai mufti serta dianugerahkan gelaran "Dato' Maharaja Lela Tan Lela", dengan kuasa boleh memancung tanpa bertanya. Pandak Lam kemudian mengetuai perjuangan menentang British di Perak dan membuat pakatan untuk membunuh James Wheller Woodfird Birch (J.W.W. Birch), Residen British Perak.



TOK JANGGUT

Haji Mohd Hassan bin Panglima Mat Munas yang lebih dikenali sebagai Tok Janggut kerana memelihara janggut sampai ke paras dada adalah seorang pahlawan Melayu yang terkenal di Kelantan. Dilahirkan pada 1853, beliau ialah seorang penentang penjajahan British semasa menentang pengenaan cukai oleh pihak British di Kelantan. Beliau juga merupakan tokoh agama Islam yang berjaya menarik sokongan banyak pengikut di Kelantan.

TOK GAJAH

Tok Gajah adalah ayah kepada Pahlawan Melayu Pahang iaitu Mat Kilau. Pada tahun 1891 hingga tahun 1895 telah berlaku pemberontakan Pahang terhadap pemerintah negerinya. Tok Gajah merupakan tokoh yang terlibat bersama dengan Datuk Bahaman, Mat Kilau dan Datuk Lela menentang penjajah Inggeris. Beliau bertindak menghalau penjajah Inggeris dengan segala tipu helahnya yang hendak merampas pemerintahan negeri Pahang. Beliau mempunyai semangat perjuangan yang gigih serta sanggup berdepan dengan askar-askar Inggeris yang lengkap bersenjata.



SEMANGAT MERDEKA

Wan Nur Shaziyani Wan Mohd Rosly

**bertalu dirempuh gelombang penjajah
bangkit anak-anak watan tekad berdepan
memikul tugas bersama merancang
ibu pertiwi di benteng teguh hadang berkunci
nama-nama wira tersohor meniti di bibir
rela menentang pertaruh nyawa
hafallah wahai generasi muda**

**darah keringat melimpah ke bumi
berani bertarung demi segenggam maruah
tidak rela disekat lagi
minda dibebaskan memenuhi global
merdeka dituntut adat ditaut kemas**

**sebuah negara bernama Malaysia
bersaing dalam arus kekangan prinsip
tiada lupa pahlawan perkasa
corak warna merdeka bangsa
dilukis dengan air mata wira
seiring tahta berdaulat
merdeka selamanya.**

ALAM KEBEBASAN

Siti Nurleena Abu Mansor

Alam di mana mimpi terbang dengan sayap berkilauan,
Di mana hati berlari bebas, dan jiwa menyanyi girang,
Juga di mana warna yang paling murni bersinar,
Tanah yang tiada batas, itulah alam mimpi kebebasan.

Kebebasan, adakah kau hanya pemikiran yang lalu?
Hembusan bayu lembut menjadikan harapan kita terperangkap?
Tidak, kau lebih dari itu, mercu tanda yang membakar terang,
Membimbing segala jiwa melalui malam yang paling gelap bungkam.


Sentuhanmu menghidupkan nyala kehendak manusia,
Sebuah daya yang meluap, memberi kuasa, dan memenuhi,
Menghancurkan belenggu cengkaman penindasan,
Dalam dakapanmu, hikayat keberanian terungkap.

Dari puncak gunung ke lautan yang luas dan dalam,
Intipatimu menggetarkan hati semua yang bergulat,
Simfoni suara yang dialunkan dalam nyanyian,
Bebenang cerita kehidupan yang beragam, dianyam kukuh.

Kau adalah kanvas, kosong dan tidak terbatas,
Di mana seni unik setiap jiwa terabadikan,
Tiada batas membatasi impian yang kita kejar,
Di alam kebebasan, kita menemukan tempat yang tuntas.

Dengan sayap kebebasan, kita terbang di atas,
Merangkul keadilan, pengertian, juga cinta,
Tiada belenggu dapat mengikat jiwa yang telah bebas,
Karena di dalam hati, kita pegang kunci itu.

Ayuh kita hargai, jaga, dan ingat,
Hadiah berharga dari tali kebebasan yang mengikat,
Dalam kesatuan, kita berdiri dalam dunia yang bebas,
Di alam abadi kemanusiaan





CARILAH...DEFINISI KEBEBASAN ITU

Elly Johana Johan

Kadang kala jiwa terasa membeku
Jasad seakan dingin membeku
Iman dan keyakinan tidak bersatu
Jiwa dijajah hawa dan nafsu

Carilah
Segaris putih dalam pekatnya hitam

Bangkitlah duhai kalbu
Cari jalan menuju RobbMu
Bebas dari penjara yang membelenggu
Kibarkan bendera yang direstu

Carilah
Ketenangan dalam kekalutan dunia

Carilah
Cahaya dalam gelapnya malam

Carilah
Kebebasan dalam rasa terpenjara

Carilah
Kebahagiaan dalam peritanya ujian

Carilah
Definisi merdeka dalam kehambaan

Carilah
Kesabaran dalam maraknya amarah

Carilah
Terma kepatuhan dalam kemerdekaan

Carilah
Kebaikan dalam timbunan keburukan

Carilah
Nescaya kau akau temui
Apa itu kebebasan
Pada iman dan jiwa
Pada roh dan jasad
Pada setiap kejadian
Dari pemilik mutlak setiap kemerdekaan

Carilah
Kedamaian dalam mendungnya alam

*Carilah dan terus mencari...
Carilah...definisi kebebasan itu*





PERWIRA

Nurhafizah Ahmad

Perwira itu

*Di tangannya berbekal senjata,
Di bahunya tergalas amanah,
Melangkah dengan tangkas berani,
Demi mempertahankan pertiwi.*

Perwira itu

*Tubuhnya menjadi benteng,
Menepis segala ancaman,
Beraksi di darat, lautan juga awan membiru,
Biar keringatnya menjadi merah,
Tanpa gentar musuh diburu.*

Perwira itu

*Berberet hijau penuh kemegahan,
Terus setia megah berbakti,
Walaupun namanya tidak didendang,
Semangatnya terus kekal menjulang.*

*Ayuhlah anak bangsa,
Sentiasalah hargai jasanya,
Bukan hanya bermusim saja,
Bersama kita berjuang,
Demi keamanan tanah air Malaysia.*

Bunga Kebangsaan Malaysia

Teratai Melur Tanjung Cempaka
Raya Mawar dan juga Kenanga
Disenarai semua tujuh bunga
Untuk dipilih bunga negara.



Disyitihar oleh Menteri Pertama
Tunku Abdul Rahman Bapa Merdeka
Merah membara itulah dia
Bunga kebangsaan si bunga raya.

Bunga raya kelopakunya lima
Menjadi lambang rukun negara
Anak Malaysia maju bersama
Di pentas dunia, gemilang berjaya.

Nukilan: Hanim Omar

TEKA SILANG KATA MERDEKA: KENALI JATA NEGARA

Norshuhada Samsudin & Sharifah Sarimah Syed Abdullah



MELINTANG

2. Dua ekor _____ melambangkan keberanian, kegagahan dan kekuatan.
4. _____ dan bintang melambangkan agama Islam sebagai agama Persekutuan.
5. JATA membawa maksud lambang _____ negeri atau negara.
6. Cogan kata _____ ditulis dengan tulisan rumi dan jawi di kiri dan kanan jata negara.

MENEGAK

1. _____ di tengah-tengah Jata merupakan bunga kebangsaan.
3. Warna _____ dan kuning melambangkan negeri-negeri Melayu Bersekutu iaitu Pahang, Selangor, Perak dan Negeri Sembilan.
7. Bintang pecah 14 di Jata Negara menandakan _____ negeri dan Kerajaan Persekutuan.



**MALAYSIA
MADANI**
TEKAD PERPADUAN PENUHI HARAPAN



UNIVERSITI
TEKNOLOGI
MARA

Cawangan Pulau Pinang
Kampus Permatang Pauh

Unit Penerbitan e-Buletin
Jabatan Sains Komputer dan Matematik
UiTM Cawangan Pulau Pinang
13500 Permatang Pauh
Pulau Pinang

eISSN 2637-0077



9 772637 007004